

**KONTRAS – UNDANG-UNDANG KECIL**

**PEJABAT URUSAN**  
**KOPERASI NIAGA TERAS SELANGOR BERHAD**  
B2-3-4 Temasya 8, Glenmarie U1/67  
40150 Shah Alam, Selangor

**TARIKH DAFTAR**  
X November 2020

**NO. DAFTAR**  
ABCXXXXX

**VERSI UNDANG-UNDANG KECIL**  
V1.0

## **SUSUNAN UNDANG-UNDANG KECIL**

### **BAHAGIAN I**

#### **PERMULAAN**

1. Tajuk dan mula berkuatkuasa.
2. Tafsiran.
3. Perubahan dari segi nahu, jenis jantina dan bilangan.

### **BAHAGIAN II**

#### **NAMA, ALAMAT BERDAFTAR DAN KAWASAN OPERASI**

4. Nama.
5. Alamat.
6. Kawasan operasi.

### **BAHAGIAN III**

#### **MATLAMAT, FUNGSI DAN AKTIVITI**

7. Matlamat.
8. Fungsi.
9. Aktiviti.

## **KONTRAS – UNDANG-UNDANG KECIL**

### **BAHAGIAN IV**

#### **KEANGGOTAAN**

10. Anggota.
11. Kelayakan menjadi anggota.
12. Permohonan menjadi anggota.
13. Fi masuk.
14. Ikrar anggota.
15. Penerimaan menjadi anggota.
16. Perolehan hak, kewajipan dan liabiliti anggota.
17. Pemberian Undang-undang Kecil.
18. Penama.
19. Liabiliti anggota.
20. Hilang kelayakan sebagai anggota.
21. Terhenti menjadi anggota.
22. Menarik diri.
23. Penggantungan dan pembuangan anggota.
24. Penyelesaian wang anggota.

### **BAHAGIAN V**

#### **ORGANISASI DAN PENGURUSAN KOPERASI**

25. Mesyuarat agung.
26. Mesyuarat agong pertama.
27. Mesyuarat agung tahunan

## KONTRAS – UNDANG-UNDANG KECIL

28. Mesyuarat agung khas.
29. Notis mesyuarat agung.
30. Kuorum mesyuarat agung perwakilan.
31. Undi mesyuarat agung perwakilan.
32. Pembatalan dan tundaan mesyuarat agung perwakilan khas.
33. Fungsi mesyuarat agung perwakilan.
34. Pengerusi mesyuarat agung perwakilan.
35. Lembaga Koperasi.
36. Kelayakan menjadi anggota Lembaga.
37. Tempoh memegang jawatan.
38. Lucut dan penggantungan jawatan.
39. Penamatan pelantikan.
40. Mesyuarat Lembaga.
41. Kuorum mesyuarat Lembaga.
42. Urusan mesyuarat Lembaga.
43. Undi anggota Lembaga.
44. Buku minit mesyuarat Lembaga.
45. Kuasa dan kewajipan Lembaga.
46. Liabiliti anggota Lembaga.
47. Kewajipan pengerusi.
48. Kewajipan setiausaha.
49. Kewajipan bendahari.
50. Jawatankuasa Audit Dalaman.
51. Kelayakan menjadi Jawatankuasa Audit Dalaman.

## **KONTRAS – UNDANG-UNDANG KECIL**

- 52. Tempoh memegang jawatan.
- 53. Kuasa dan kewajipan Jawatankuasa Audit Dalaman.

### **BAHAGIAN VI**

#### **ASET DAN WANG KOPERASI**

- 54. Wang dan kumpulan wang Koperasi.
- 55. Modal syer.
- 56. Yuran.
- 57. Pindahan syer.
- 58. Penyelesaian modal syer.
- 59. Keuntungan modal.
- 60. Kumpulan Wang Rizab Statutori.
- 61. Simpanan khas, deposit atau pembiayaan
- 62. Pembiayaan luar.
- 63. Pelaburan wang.
- 64. Pemberian pembiayaan oleh Koperasi.
- 65. Pengagihan untung bersih teraudit.
- 66. Dividen dan potongan langganan.

### **BAHAGIAN VII**

#### **AKAUN DAN AUDIT**

- 67. Tahun kewangan.
- 68. Penyenggaraan akaun.

## **KONTRAS – UNDANG-UNDANG KECIL**

- 69. Resit-resit dan baucar.
- 70. Pelantikan dan kewajipan juruaudit.
- 71. Penyerahan buku dan dokumen untuk diaudit.
- 72. Mengemukakan penyata kewangan dan laporan-laporan.

## **BAHAGIAN VIII**

### **PELBAGAI**

- 73. Akaun bank.
- 74. Mohor Koperasi.
- 75. Pertukaran alamat anggota.
- 76. Penyediaan dokumen untuk diperiksa.
- 77. Penyerahan tugas.
- 78. Laporan oleh seseorang yang dilantik mewakili Koperasi.
- 79. Pelantikan Yang Dipertua.
- 80. Pertikaian.
- 81. Pemeliharaan kerahsiaan.
- 82. Pembubaran.
- 83. Akta, Peraturan dan Undang-Undang Kecil.
- 84. Undang-Undang Kecil hendaklah mengikat anggota.

## KONTRAS – UNDANG-UNDANG KECIL

### BAHAGIAN 1

#### PERMULAAN

1. Undang-undang Kecil ini bolehlah dinamakan **Undang-Undang Kecil Koperasi Niaga Teras Selangor Berhad** dan hendaklah mula berkuatkuasa pada tarikh ianya didaftarkan oleh Ketua Pendaftar. *Tajuk dan mula berkuatkuasa.*

2. Di dalam Undang-undang Kecil ini, melainkan jika *Tafsiran* konteksnya menghendaki makna yang lain: -

"**Akta**" ertinya Akta Koperasi 1993 dan pindaan-pindaan yang dibuat kepadanya dari semasa ke semasa;

"**Anggota**" termasuklah seseorang yang turut sama dalam permohonan pendaftaran Koperasi ini dan seseorang yang diterima menjadi anggota mengikut Peraturan dan Undang-undang Kecil ini selepas pendaftaran sebagaimana yang ditakrifkan di bawah seksyen 2 Akta;

"**Anggota Eksekutif Lembaga**" ertinya mana-mana orang yang dilantik sebagai anggota sepenuh masa Lembaga Koperasi ini dan terlibat dengan pentadbiran dan pengurusan harian urusan dan perniagaan Koperasi ini sebagaimana yang ditakrifkan di bawah peraturan 2 Peraturan;

"**Aturan-Aturan**" ertinya aturan-aturan yang dibuat oleh Lembaga dari semasa ke semasa bagi melaksanakan mana-mana aktiviti yang dijalankan oleh Koperasi termasuklah skim simpanan khas atau skim pemberian pembiayaan atau kemudahan kredit, tertakluk kepada peruntukan-peruntukan Akta, Peraturan, Undang-undang Kecil dan kelulusan mesyuarat agung;

"**Dividen**" ertinya bahagian keuntungan Koperasi ini yang dibahagikan di kalangan anggota-anggotanya mengikut kadar modal syer atau modal yuran yang dipegang oleh mereka sebagaimana yang ditakrifkan

## KONTRAS – UNDANG-UNDANG KECIL

di bawah seksyen 2 Akta;

"**Elaun**" ertinya saraan yang dibayar kepada seseorang anggota Lembaga atau seseorang anggota Jawatankuasa Audit Dalam bagi Koperasi ini sebagai balasan kerana khidmat-khidmatnya yang diberikan kepada Koperasi ini secara tetap, sebagaimana yang ditakrifkan di bawah subseksyen 46(3) Akta;

"**Kesalahan Boleh Daftar**" ertinya kesalahan yang boleh didaftarkan di bawah Akta Pendaftaran Penjenayah-penjenayah dan Orang-orang Tak Diingini 1969 sebagaimana yang dinyatakan dalam Jadual Pertama dan Kedua kepada Akta itu;

"**Ketua Pendaftar**" ertinya Ketua Pendaftar Koperasi yang dilantik di bawah seksyen 3 Akta dan termasuklah mana-mana Pendaftar apabila menjalankan kuasa-kuasa Ketua Pendaftar sebagaimana yang dianugerahkan kepadanya di bawah seksyen tersebut itu;

"**Koperasi**" atau "**Koperasi ini**" ertinya Koperasi Niaga Teras Selangor Berhad;

"**Lembaga**" ertinya badan pengelola Koperasi ini yang kepadanya pengurusan hal-ehwal Koperasi ini diamanahkan sebagaimana yang ditakrifkan di bawah seksyen 2, dan dibentuk menurut perenggan 42(a), serta tertakluk kepada seksyen 44 dan 45 Akta;

"**Maqasid Al-Syariah**" ertinya prinsip-prinsip Islam mengikut peringkat daruriyyat, hajjiyyat dan tahsiniyyat di dalam lima (5) asas utama iaitu memelihara agama, jiwa, minda, harta dan keturunan untuk menitipi masalah dan menghindari mafsadah sebagai teras Koperasi ini dalam menjaga kepentingan anggota-anggotanya.

"**Menteri**" ertinya Menteri yang pada masa ini dipertanggungjawabkan dengan pembangunan koperasi sebagaimana yang ditakrifkan di bawah



## KONTRAS – UNDANG-UNDANG KECIL

peraturan 2 Peraturan;

**“Patuh Syariah”** ertinya prinsip-prinsip muamalat dan khairat atau perniagaan dan kebajikan yang berlandaskan nas Al-Quran, Al-Hadith, Al-Qiyas, Al-Ijmak dan Fatwa-Fatwa yang muktabar yang dikeluarkan oleh mana-mana badan, jawatankuasa atau organisasi fatwa rasmi. Dalam perihal muamalat dan perniagaan, Koperasi ini menerimapakai Piawaian Syariah yang diterbitkan oleh Accounting and Auditing Organisation for Islamic Financial Institutions (AAOIFI).

**"Pegawai"** ertinya pengerusi, setiausaha, bendahari atau mana-mana anggota lain Lembaga dan termasuklah mana-mana orang lain yang diberikuasa oleh Peraturan atau Undang-undang Kecil ini untuk memberikan arahan-arahan berkenaan dengan urusan Koperasi ini, sebagaimana yang ditakrifkan di bawah seksyen 2 Akta;

**"Peraturan"** ertinya Peraturan-peraturan Koperasi 1995 yang dibuat di bawah Akta dan pindaan-pindaan yang dibuat kepadanya dari semasa ke semasa;

**"Perlantikan"** termasuklah apa-apa perlantikan atau perlantikan semula melalui pemilihan sebagaimana yang ditakrifkan di bawah seksyen 2 Akta;

**“Pembiayaan”** ertinya pembiayaan Patuh Syariah yang tidak melibatkan sebarang faedah atau sebarang bentuk pulangan ke atas pembiayaan sama ada diterima oleh Koperasi atau yang diberikan kepada mana-mana pihak oleh Koperasi;

**"Potongan Langgan"** ertinya bahagian keuntungan Koperasi ini yang dibahagikan di kalangan anggota-anggota mengikut kadar banyaknya perniagaan yang dilakukan oleh mereka dengan Koperasi ini dan yang daripadanya keuntungan Koperasi ini diperolehi sebagaimana yang ditakrifkan di bawah seksyen 2 Akta;

## KONTRAS – UNDANG-UNDANG KECIL

**"Prinsip-Prinsip Koperasi"** termasuklah -

- (a) keanggotaan sukarela dan terbuka;
- (b) pengurusan yang demokratik;
- (c) pulangan terhad atas modal yang disumbangkan oleh anggota- anggota;
- (d) pembahagian keuntungan dengan saksama;
- (e) penggalakan pendidikan koperasi; dan
- (f) kerjasama aktif di kalangan koperasi-koperasi berdaftar;

**"Sabitan"** termasuklah sesuatu dapatan bersalah dan pembuktian kesalahan sebagaimana yang ditakrifkan di bawah seksyen 2 Akta;

**"Simpanan Khas"** ertinya wang yang didepositkan oleh seseorang anggota dengan Koperasi ini dengan niat nyata untuk menggunakan wang yang didepositkan itu untuk suatu maksud yang dinyatakan yang dibenarkan di bawah Peraturan, sebagaimana yang ditakrifkan di bawah seksyen 2 Akta dan tertakluk kepada Undang-undang Kecil ini;

**"Subsidiari"** ertinya sesuatu syarikat, sebagaimana yang ditakrifkan dalam Akta Syarikat 2016, yang komposisi Lembaga Pengarahnya atau lebih daripada separuh kuasa mengundinya dikawal oleh Koperasi ini, atau yang lebih daripada separuh modal syer diterbitkannya dipegang oleh Koperasi ini, dan termasuklah sesuatu subsidiari, sebagaimana yang ditakrifkan dalam Akta itu, bagi syarikat itu;

**"Syer"** ertinya bahagian dalam modal syer bagi Koperasi ini yang disumbangkan oleh seseorang anggota berkenaan dengan keanggotaannya dalam Koperasi ini sebagaimana yang ditakrifkan di bawah seksyen 2 Akta;

## KONTRAS – UNDANG-UNDANG KECIL

“**Tribunal**” ertinya tribunal yang ditubuhkan di bawah seksyen 83 Akta;

"**Undang-Undang Kecil**" ertinya Undang-undang Kecil ini dan termasuklah sesuatu pindaan berdaftar kepada Undang-undang Kecil ini;

"**Wang Berlebihan**" ertinya wang yang melebihi amaun yang diperlukan oleh Koperasi ini bagi kegunaan segera sebagai modal kerja bagi perniagaannya yang boleh didepositkan atau dilaburkan di luar Koperasi ini tanpa menjejaskan pengendalian perniagaannya sebagaimana yang ditakrifkan di bawah seksyen 2 Akta;

"**Yuran**" ertinya jumlah wang yang disumbangkan pada lat-lat masa yang tetap oleh seseorang anggota berkenaan dengan keanggotaannya dalam Koperasi ini dan boleh dikeluarkan apabila tamat keanggotaannya, sebagaimana yang ditakrifkan di bawah seksyen 2 Akta. Walaubagaimanapun, Yuran bagi maksud undang undang kecil 56 membawa maksud simpanan atau pelaburan bulanan anggota terhadap skim skim simpanan yang dikelolakan oleh Koperasi.

3. (1) Jika mana-mana perkataan atau perbahasan ditakrif dalam sesuatu undang-undang bertulis, takrif itu hendaklah diperluaskan kepada segala perubahan nahu dan perbahasan konat perkataan itu atau perbahasan yang ditakrifkan. *Perubahan dari segi nahu, jenis jantina dan bilangan*
- (2) Perkataan-perkataan dan perbahasan-perbahasan yang memaksudkan jenis lelaki meliputi perempuan.
- (3) Perkataan-perkataan dan perbahasan-perbahasan dalam bilangan tunggal meliputi bilangan jamak, dan perkataan-perkataan dan perbahasan-perbahasan dalam bilangan jamak meliputi bilangan tunggal.

## KONTRAS – UNDANG-UNDANG KECIL

### BAHAGIAN II

#### NAMA, ALAMAT BERDAFTAR DAN KAWASAN OPERASI

4. Menurut subseksyen 7(4) dan (5) Akta, Koperasi ini hendaklah dinamakan **Koperasi Niaga Teras Selangor Berhad** atau dengan nama ringkasnya **Kontras**. *Nama*
5. Alamat yang didaftarkan bagi Koperasi ini ialah **B2-3-4 Temasya 8, Glenmarie U1/67, 40150 Shah Alam Selangor** dan Koperasi hendaklah memberitahu kepada Ketua Pendaftar dalam tempoh tiga puluh (30) hari sebagaimana yang ditetapkan di bawah subperaturan 47(2) Peraturan, tentang tiap-tiap pertukaran alamat menurut seksyen 11 Akta. *Alamat*
6. Bagi maksud perenggan 26(c) Akta, kawasan operasi Koperasi ini ialah di **Negeri Selangor dan Wilayah Persekutuan Kuala Lumpur**. *Kawasan Operasi*

### BAHAGIAN III

#### MATLAMAT, TUJUAN DAN AKTIVITI

7. Matlamat Koperasi ini menurut subseksyen 4(1) Akta ialah untuk:- *Matlamat*
  - (a) meningkatkan kepentingan ekonomi anggota-anggotanya; dan
  - (b) membantu meningkatkan kepentingan ekonomi masyarakat beragama Islam seluruh negara;mengikut prinsip-prinsip Koperasi.
8. Tujuan-tujuan Koperasi ini ialah untuk menjalankan fungsi muamalat dan khairat ataupun perniagaan dan kebajikan berkaitan produk, perkhidmatan dan perundingan yang **Patuh Syariah** serta menepati tujuan **Maqasid Al-Syariah**. *Tujuan*

## KONTRAS – UNDANG-UNDANG KECIL

9. (1) Bagi mencapai matlamat yang tersebut di dalam *Aktiviti-Aktiviti* undang-undang kecil 7 amnya dan tujuan yang tersebut di dalam undang-undang kecil 8 khususnya, Koperasi bolehlah, tertakluk kepada peruntukan Akta dan Peraturan, menjalankan aktiviti-aktiviti berikut:
- (a) Peruncitan, pemborongan dan penjualan barangan asas, runcit basah, kering dan pukal;
  - (b) Pemasaran barangan, perkhidmatan atau perundingan;
  - (c) perladangan termasuk memajukan tanah untuk tujuan pertanian atau perladangan atau pengurusan ladang dan aktiviti melibatkan penternakan dan perikanan;
  - (d) industri pembinaan, kontrak dan penyelenggaraan mekanikal, struktur, bangunan dan melibatkan pembinaan dan pembangunan hartanah, termasuk pengurusan dan penjualan unit pembangunan;
  - (e) pemberian kredit atau pembiayaan kepada anggota-anggota Koperasi dan aktiviti-aktiviti yang melibatkan kredit pengguna;
  - (f) pendidikan dan kebajikan anggota, keluarga anggota Koperasi dan masyarakat Islam di kawasan aktiviti Koperasi;
  - (g) agensi berkaitan zakat dan infaq sama ada dari segi kutipan atau pengagihan semula kepada asnaf dan fakir miskin di kawasan aktiviti Koperasi;
  - (h) aktiviti melibatkan kajian-kajian dan penyelidikan serta menyediakan perkhidmatan khidmat nasihat dan konsultansi;
  - (i) menjalankan aktiviti berkaitan perbankan, takaful, sewa beli dan pajak gadai;

## KONTRAS – UNDANG-UNDANG KECIL

- (j) aktiviti perniagaan yang melibatkan perkhidmatan penginapan dan hospitaliti, pelancongan, pemakanan, penyediaan makanan, katering dan francais;
- (k) membeli, menjual, memindahkan hak milik, mendirikan, menyewa, mencagar, memajak, mengadai dan memiliki harta- harta alih dan harta-harta tak alih;
- (l) aktiviti perniagaan melibatkan pengangkutan, sama ada perkhidmatan penyediaan pengangkutan, penjualan atau pembelian, penyewaan, pajakan termasuk menjalankan perkhidmatan teksi, bas, feri, kapal, penerbangan, lori dan lain-lain perkhidmatan yang melibatkan pengangkutan,
- (m) menjalankan aktiviti pendidikan dan latihan termasuk pendidikan sampingan bagi kanak-kanak dan pendidikan dan latihan di peringkat sijil, diploma dan ijazah dan menubuhkan institusi akademik dan teknikal;
- (n) menjalankan aktiviti pengurusan dan/atau perniagaan pusat perubatan, hospital, pusat kesejahteraan dan pusat pemulihan;
- (o) menjalankan aktiviti kajian, penyelidikan dan Pembangunan termasuk aktiviti-aktiviti melibatkan analisis dan tinjauan;
- (p) melaburkan wang berlebihan dalam perkara-perkara yang dibenarkan di bawah seksyen 54 Akta;
- (q) mengadakan subsidiari di bawah seksyen 19 Akta dengan kelulusan Ketua Pendaftar; dan
- (r) menyertai usahasama dan menjadi anggota kepada koperasi-koperasi lain.

## KONTRAS – UNDANG-UNDANG KECIL

(2) Bagi melaksanakan aktiviti-aktiviti di bawah fasal (1) undang-undang kecil ini, Koperasi boleh mendapatkan modal dengan cara -

(a) mengumpul syer, yuran dan simpanan khas daripada anggota-anggota;

(b) dan mendapatkan pembiayaan-pembiayaan dan pelaburan-pelaburan daripada anggota-anggota dan bukan anggota termasuk tertakluk kepada peruntukan-peruntukan seksyen 50 Akta;

(c) melalui geran Kerajaan.

(3) Bagi mengendalikan sesuatu aktiviti yang disebutkan di dalam fasal (1) itu, Lembaga hendaklah membuat aturan-aturan aktiviti yang sesuai yang diluluskan oleh mesyuarat agung dan satu salinannya dikemukakan kepada Ketua Pendaftar.

(4) Bagi melaksanakan skim berhubung dengan simpanan khas atau pembiayaan menurut peraturan 26 Peraturan, Lembaga hendaklah –

(a) menyediakan suratcara berasingan yang menyatakan dengan jelas terma-terma dan syarat-syarat bagi tiap-tiap skim;

(b) mengemukakan suratcara skim itu kepada mesyuarat agung untuk kelulusan; dan

(c) mengemukakan satu salinan suratcara yang diluluskan itu kepada Ketua Pendaftar dalam masa satu bulan selepas diluluskan oleh mesyuarat agung itu.

## BAHAGIAN IV

### KEANGGOTAAN

10. Anggota-anggota Koperasi ini terdiri daripada *Anggota*.

## KONTRAS – UNDANG-UNDANG KECIL

sekalian mereka yang turut sama dalam permohonan untuk mendaftarkan Koperasi ini dan mereka yang diterima menjadi anggota selepas pendaftaran mengikut Peraturan dan Undang-undang Kecil ini dari semasa ke semasa.

11. (1) Keanggotaan Koperasi ini terbuka kepada semua **Pengguna Muslim**.  
(2) Menurut seksyen 26 dan 27 Akta, seseorang yang ingin menjadi anggota Koperasi ini mestilah--
  - (a) warganegara Malaysia;
  - (b) telah mencapai umur lapan belas tahun;
  - (c) bermastautin atau bekerja atau mempunyai tanah dalam kawasan operasi Koperasi ini; dan
  - (d) bukan seorang yang terhadapnya masih berkuatkuasa suatu sabitan bagi kesalahan boleh daftar, atau tidak upaya dari segi mental, atau bankrap yang belum dilepaskan, atau pernah dibuang daripada keanggotaan mana-mana koperasi dalam tempoh satu tahun.
12. Permohonan menjadi anggota hendaklah dibuat dalam borang rasmi Koperasi ini dan dialamatkan kepada setiausaha. *Permohonan menjadi anggota.*
13. (1) Tiap-tiap permohonan menjadi anggota hendaklah disertakan dengan Fi masuk sebanyak tiga puluh (30) ringgit. *Fi masuk.*  
(2) Bekas anggota yang memohon untuk menjadi anggota semula dikenakan Fi masuk sebanyak sembilan puluh (90) ringgit.  
(3) Fi masuk itu menurut perenggan 50(a) Akta akan dikembalikan kepada pemohon jika permohonannya ditolak oleh Lembaga.  
(4) Penama atau wakil yang sah menurut seksyen 24



## KONTRAS – UNDANG-UNDANG KECIL

Akta kepada anggota yang mati, jika layak menurut undang-undang kecil 11 dan memohon untuk menjadi anggota dalam masa tiga bulan selepas kematian anggota itu, tidak dikenakan Fi masuk.

(5) Semua Fi masuk hendaklah dikreditkan ke dalam akaun untung rugi.

14. (1) Menurut subperaturan 10(1) Peraturan, seseorang yang memohon untuk menjadi anggota hendaklah diminta menandatangani suatu ikrar bahawa dia akan terikat dengan Undang-undang Kecil ini dan aturan-aturan aktiviti yang sedia ada dan apa-apa pindaan kepada Undang-undang Kecil dan aturan-aturan tersebut, yang dibuat dengan sah semasa tempoh keanggotaannya, dan bahawa dia bukan seorang bankrap yang belum dilepaskan atau seorang yang terhadapnya masih berkuatkuasa suatu sabitan bagi kesalahan yang boleh daftar dan dia tidak pernah dibuang daripada keanggotaan mana-mana koperasi dalam tempoh satu tahun. Mana-mana pemohon yang enggan menandatangani ikrar tersebut tidak boleh diterima menjadi anggota. *Ikrar Anggota.*
- (2) Menurut subperaturan 10(2) Peraturan, seseorang yang telah menjadi anggota dengan sebab turut sama dalam membuat permohonan bagi pendaftaran Koperasi ini dikehendaki menandatangani ikrar yang serupa dalam masa empat puluh lima hari selepas diterima perakuan pendaftaran Koperasi.
15. Permohonan menjadi anggota hendaklah dipertimbangkan oleh Lembaga dalam mesyuaratnya yang boleh menerima atau menolak sesuatu permohonan itu tanpa menyatakan sebab-sebabnya. Seseorang yang diterima menjadi anggota hendaklah diberitahu secara bertulis tidak lewat daripada tiga puluh hari selepas penerimaannya itu. *Penerimaan menjadi anggota.*
16. Menurut seksyen 28 Akta, tiap-tiap anggota yang telah menjelaskan bayaran penuh syer bolehlah melaksanakan segala hak, kewajipan dan liabiliti sebagai seorang anggota sebagaimana yang *Perolehan hak, kewajipan dan liabiliti anggota.*

## KONTRAS – UNDANG-UNDANG KECIL

terkandung di dalam Undang-undang Kecil ini.

17. Tiap-tiap anggota hendaklah diberi dengan percuma satu naskhah Undang-undang Kecil ini. Naskhah tambahan akan dikenakan bayaran sebanyak lima (5) ringgit tiap-tiap satu. *Pemberian Undang-undang Kecil.*
  
18. (1) Tiap-tiap anggota hendaklah dengan mengisi satu borang rasmi Koperasi ini, di hadapan sekurang-kurangnya dua saksi yang mengakusaksi perkara yang sama atau dengan suatu akuan yang dibuat sewajarnya, menamakan seorang wasi dari kalangan waris-waris terdekat yang mutlak tassarrufnya untuk menerima setelah dia mati, syer, kepentingan atau wang-wang yang terhak baginya atau apa-apa wang lain yang disebut dalam seksyen 24 Akta yang kena dibayar kepada anggota di dalam Koperasi ini bagi diagihkan kepada waris-waris yang berhak mengikut hukum Islam dan hendaklah memberitahu Koperasi akan perubahan-perubahan, jika ada, mengenai penamaan itu. Dalam hal-hal sedemikian, nilai syer atau kepentingan anggota itu hendaklah sama dengan jumlah wang yang sebenarnya dibayar oleh anggota itu untuk memperolehi syer atau kepentingan tersebut itu sebagaimana yang dinyatakan di bawah subperaturan 7(1) Peraturan.  
  
(2) Tertakluk kepada undang-undang kecil 11, seseorang penama atau wasi bagi maksud subperaturan 7(3) Peraturan, bolehlah diterima menjadi anggota dan penama atau wasi yang demikian itu hendaklah dianggap telah menjadi anggota mulai tarikh anggota yang digantikannya itu diterima sebagai anggota.
  
19. (1) Liabiliti seseorang anggota terhadap hutang-hutang Koperasi ini sekiranya pendaftaran Koperasi ini dibatalkan hendaklah terhad kepada jumlah syer yang dimilikinya. *Liabiliti anggota.*  
  
(2) Liabiliti seseorang bekas anggota terhadap hutang-hutang Koperasi yang ada pada tarikh keanggotaannya terhenti hendaklah tidak berterusan

## KONTRAS – UNDANG-UNDANG KECIL

lebih daripada dua tahun dari tarikh itu seperti yang diperuntukkan di bawah subseksyen 35(1) Akta.

(3) Harta pusaka seseorang anggota yang telah mati hendaklah menurut subseksyen 35(2) Akta, tidak bertanggung bagi hutang-hutang Koperasi yang ada pada tarikh kematiannya itu lebih daripada dua tahun dari tarikh itu.

20. Menurut peruntukan seksyen-seksyen 26, 27 dan 29 Akta, seseorang anggota akan hilang kelayakannya sebagai anggota jika dalam masa menjadi anggota dia: - *Hilang kelayakan sebagai anggota.*

(a) hilang kewarganegaraan; atau

(b) hilang keupayaan dari segi mental; atau

(c) diisytiharkan bankrap; atau

(d) disabitkan atas sesuatu kesalahan boleh daftar; atau

(e) dibuang daripada keanggotaan mana-mana koperasi dan suatu tempoh selama satu tahun belum lagi berlalu dari tarikh pembuangan itu; atau

(f) telah menjadi anggota koperasi berdaftar lain yang tujuan utamanya ialah untuk memberikan pembiayaan kepada anggotanya.

21. (1) Keanggotaan seseorang anggota terhenti atas sebab-sebab di bawah ini, mengikut mana yang berkenaan: *Terhenti menjadi anggota.*

(a) mati; atau

(b) menarik diri mengikut undang-undang kecil 22; atau

(c) dibuang mengikut undang-undang kecil 23.

## KONTRAS – UNDANG-UNDANG KECIL

(2) Lembaga hendaklah menyingkir seseorang anggota yang: -

(a) didapati membuat ikrar palsu di bawah undang-undang kecil 14; atau

(b) menurut peraturan 11 Peraturan, hilang kelayakan sebagai anggota di bawah undang-undang kecil 20; atau

(c) terhenti keanggotaannya di bawah perenggan (c) fasal (1) undang-undang kecil ini.

22. (1) Seseorang anggota boleh menarik diri daripada Koperasi ini dengan memberi notis bertulis satu (1) bulan terlebih dahulu kepada Lembaga. Atas sebab-sebab yang munasabah, Lembaga boleh membenarkan penarikan diri dalam masa yang singkat. *Menarik diri.*

(2) Melainkan tarikh lebih awal dipersetujui oleh Lembaga, maka keanggotaan anggota itu hendaklah terhenti hanya pada hari genap tempoh notisnya.

(3) Dalam tempoh notis itu, anggota yang demikian hendaklah masih mempunyai hak, kewajipan dan liabiliti sebagai seorang anggota.

(4) Anggota yang memohon untuk menarik diri boleh membatalkan niat menarik diri dengan memberi notis pembatalan kepada Koperasi sebelum apa-apa penyelesaian di bawah undang-undang kecil 24 dibuat.

23. (1) Jika seseorang anggota melanggar mana-mana peruntukan Undang-undang Kecil ini atau melakukan mana-mana satu daripada perbuatan-perbuatan berikut: *Penggantungan dan Pembuangan oleh mesyuarat agung.*

(a) merujukkan pertikaian atau aduan kepada mana-mana orang selain daripada Ketua Pendaftar atau tribunal; atau

## KONTRAS – UNDANG-UNDANG KECIL

(b) membuat kenyataan dalam akhbar atau mana-mana media massa mengenai Koperasi ini tanpa kebenaran Lembaga; atau

(c) membuat tuduhan palsu ke atas anggota Lembaga atau anggota-anggota atau bekas anggota atau pekerja Koperasi ini sehingga menyebabkan anggota-anggota berpecah-belah dan berpuak-puak; atau

(d) memburuk-burukkan Koperasi sehingga mencemarkan nama baik dan menjejaskan urusan perniagaan Koperasi ini; atau

(e) bertindak di luar etika mesyuarat di dalam mana-mana mesyuarat sehingga menjejaskan perjalanan mesyuarat itu,

dia hendaklah dianggap telah bertindak dengan cara yang memudaratkan kepentingan Koperasi ini dan bolehlah digantung keanggotaannya.

(2) Keputusan untuk menggantung keanggotaan seseorang anggota boleh dibuat oleh Lembaga hanya setelah anggota yang berkenaan itu diberitahu secara bertulis mengenai tuduhan yang jelas terhadapnya dan diberi peluang untuk menyatakan sebab-sebab mengapa keanggotaannya tidak boleh digantung.

(3) Tiap-tiap kes penggantungan hendaklah dibentangkan kepada mesyuarat agung yang terawal dan dijadikan sebagai agenda pertama, dan anggota yang digantung keanggotaannya itu hendaklah diberitahu secara bertulis tidak kurang daripada lima belas hari sebelum diadakan mesyuarat, tentang tarikh, masa, tempat dan haknya untuk membela diri akan dijalankan di mesyuarat itu.

(4) Sebelum mengesahkan atau menyetepikan penggantungan itu, mesyuarat agung hendaklah mendengar penjelasan anggota yang digantung oleh Lembaga itu, jika dia memilih untuk memberi

## KONTRAS – UNDANG-UNDANG KECIL

penjelasan, dan keanggotaannya tidak lucut melainkan jika mesyuarat agung dengan undi dua pertiga daripada anggota yang hadir membuat keputusan membuangnya.

(5) Sehingga perkara penggantungan keanggotaannya diputuskan oleh mesyuarat agung, anggota yang berkenaan itu tidak mempunyai apa-apa hak dan kewajiban sebagai anggota melainkan hak menyuarkan hal penggantungan keanggotaannya itu di dalam mesyuarat agung.

24. (1) Jika seseorang anggota terhenti daripada menjadi anggota Koperasi ini mengikut undang-undang kecil, semua wang kepunyaannya melainkan nilai syer miliknya setelah ditolak hutangnya dengan Koperasi ini hendaklah -
- Penyelesaian wang anggota.*
- (a) sekiranya dia dibuang, dikembalikan kepadanya dengan segera tanpa apa-apa syarat; atau
- (b) sekiranya dia hilang keupayaan dari segi mental dan tiada pentadbir bagi pusaknya atau tiada pemegang amanah bagi hartanya yang telah dilantik, dikembalikan kepada sesiapa yang difikirkan wajar untuk menerima bagi pihaknya sebaik sahaja penerima itu ditentukan; atau
- (c) sekiranya dia mati, dikembalikan kepada penamanya atau warisnya atau wakilnya yang sah mengikut seksyen 24 Akta. Disyaratkan bahawa bagi seseorang anggota Muslim, pengembalian tidak boleh dibuat melainkan kepada wakilnya yang sah atau kepada Pegawai Pentadbir Pusaka jika selepas enam bulan dari tarikh kematiannya, wakilnya yang sah tidak dapat dipastikan atau telah tidak dilantik; atau
- (d) sekiranya dia menarik diri, dikembalikan kepadanya selepas akhir tempoh notis atau bagi penarikan diri di atas sebab-sebab yang munasabah, pada bila-bila masa yang ditentukan

## KONTRAS – UNDANG-UNDANG KECIL

oleh Lembaga; atau

(e) sekiranya dia didapati bankrap, dibayar terus kepada Jabatan Insolvensi Malaysia atau mana-mana jabatan yang mentadbir urus urusan kebangkrapan.

(2) Penyelesaian mengenai syer-syer seseorang yang terhenti keanggotaannya sebagaimana yang ditentukan dalam akaun teraudit terakhir Koperasi ini hendaklah tertakluk kepada peruntukan undang-undang kecil 58 dan 59.

## BAHAGIAN V

### ORGANISASI DAN PENGURUSAN KOPERASI

25. (1) Tertakluk kepada peruntukan-peruntukan Akta, Peraturan dan Undang-undang Kecil, kuasa tertinggi bagi Koperasi ini hendaklah terletak kepada mesyuarat agung mengikut seksyen 36 Akta. Di dalam mesyuarat ini, setiap anggota yang layak di bawah Undang-undang Kecil ini berhak hadir dan mempunyai satu undi. *Mesyuarat Agung.*
- (2) Mesyuarat agung hendaklah terbahagi kepada tiga jenis iaitu mesyuarat agung pertama, mesyuarat agung tahunan dan mesyuarat agung khas.
26. Menurut seksyen 38 Akta, mesyuarat agung pertama anggota hendaklah diadakan dalam tempoh tiga bulan selepas perakuan pendaftaran diterima oleh Koperasi. *Mesyuarat agung pertama.*
27. Mesyuarat agung tahunan menurut seksyen 39 Akta, hendaklah diadakan tidak lewat daripada enam bulan selepas berakhirnya setiap tahun kewangan. *Mesyuarat agung tahunan.*
28. (1) Lembaga pada bila-bila masa boleh, dan apabila ada rekuisisi yang ditandatangani oleh sekurang-kurangnya satu perlima atau satu ratus anggota mengikut mana yang kurang hendaklah, memanggil suatu mesyuarat agung khas mengikut subseksyen *Mesyuarat agung khas.*

## KONTRAS – UNDANG-UNDANG KECIL

40(1) Akta.

(2) Ketua Pendaftar atau mana-mana orang yang diberikuasa oleh Ketua Pendaftar menurut subseksyen 40(2) Akta, boleh memanggil pada bila-bila masa suatu mesyuarat agung khas, mengikut cara dan pada masa dan di tempat yang diarahkannya, dan boleh menentukan perkara-perkara yang hendaklah dibincangkan oleh mesyuarat itu, dan mesyuarat itu hendaklah mempunyai segala kuasa dan tertakluk kepada kaedah-kaedah yang sama seperti mesyuarat agung yang dipanggil mengikut Akta atau Undang-undang Kecil ini.

29. (1) Notis bagi sesuatu mesyuarat agung hendaklah diberi kepada anggota-anggota tidak kurang daripada lima belas hari sebelum diadakan mesyuarat agung itu. *Notis mesyuarat agung.*

(2) Notis ini hendaklah menentukan tarikh, masa, tempat dan agenda mesyuarat dan bagi mesyuarat agung tahunan menurut subseksyen 59(2) Akta, hendaklah disertakan dengan akaun-akaun dan kunci kira-kira Koperasi ini dan subsidiari atau subsidiari-subsidiarinya, jika ada, yang teraudit dengan sewajarnya, anggaran belanjawan bagi tahun yang akan datang, laporan Lembaga dan laporan Jawatankuasa Audit Dalaman dan dokumen-dokumen lain yang berkaitan. Satu salinan notis hendaklah dipamerkan di pejabat Koperasi ini dan sebagai tambahan boleh juga diterbitkan di dalam mana-mana akhbar tempatan.

(3) Bagi maksud seksyen 41 Akta, Lembaga hendaklah memberi kepada Ketua Pendaftar notis bertulis yang mengandungi maklumat tentang tarikh, masa, tempat dan agenda mesyuarat agung yang akan diadakan oleh Koperasi tidak kurang daripada tiga puluh hari sebelum diadakan mesyuarat agung itu.

30. (1) Tertakluk kepada fasal (2) dan fasal (3) undang-undang kecil ini, kuorum bagi sesuatu mesyuarat agung bagi apa-apa maksud adalah seperti ditetapkan *Kuorum mesyuarat agung.*



## KONTRAS – UNDANG-UNDANG KECIL

dibawah Peraturan.

(2) Bagi sesuatu mesyuarat agung khas di bawah fasal (2) undang-undang kecil 28 yang ditunda, apa-apa bilangan anggota yang tidak kurang daripada dua kali ganda bilangan anggota Lembaga yang hadir hendaklah dikira mencukupi kuorum akan tetapi keputusan-keputusan tidak boleh dibuat melainkan dengan kelebihan undi dua pertiga daripada anggota-anggota yang hadir dan layak mengundi sebagaimana yang diperuntukkan di bawah subperenggan 13(2)(b)(iii) Peraturan.

(3) Kuorum bagi mesyuarat agung kerana meminda Undang-undang Kecil ini menurut subperaturan 6(1) Peraturan hendaklah dua pertiga dari jumlah anggota, melainkan kuorum terkurang dibenarkan oleh Ketua Pendaftar di bawah subperaturan 6(2) Peraturan.

31. Semua perbahasan kecuali yang berkaitan dengan pindaan Undang-undang Kecil hendaklah diputuskan dengan majoriti mudah undi anggota-anggota yang hadir sebagaimana di dalam daftar kehadiran. Jika undi sama banyak, maka usul yang diundi itu hendaklah disifatkan kalah. Anggota-anggota yang berkecuali dianggap tidak menyokong usul itu. Pengerusi mesyuarat tidak mempunyai undi pemutus sebagaimana yang disebutkan di bawah subseksyen 30(1) Akta. *Undi mesyuarat agung.*
32. (1) Jika selepas tiga puluh minit daripada waktu yang ditetapkan bagi sesuatu mesyuarat agung khas itu bilangan anggota yang hadir masih belum mencukupi kuorum, maka mesyuarat agung itu – *Tundaan mesyuarat agung khas.*
- (a) jika dipanggil oleh Lembaga atau atas permintaan anggota-anggota hendaklah dibatalkan; atau
- (b) jika dipanggil menurut subseksyen 40(2) Akta, hendaklah ditunda kepada satu tarikh lain tidak kurang daripada empat belas hari tetapi tidak lebih daripada tiga puluh hari dari tarikh

## KONTRAS – UNDANG-UNDANG KECIL

yang ditetapkan dan notis mengenai penundaannya hendaklah diposkan dalam tempoh tujuh hari dari tarikh yang ditetapkan bagi mesyuarat itu.

(2) Perkara-perkara yang telah dicadangkan bagi mesyuarat agung yang ditunda hendaklah dibincangkan pada mesyuarat tertunda itu. Jika ada apa-apa perubahan dibuat kepada perkara-perkara yang telah dicadangkan itu, maka notis menurut fasal (1) undang-undang kecil 29 hendaklah diberi kepada tiap-tiap anggota bagi mesyuarat tertunda itu.

33. (1) Menurut peraturan 12 Peraturan, urusan-urusan berikut hendaklah dijalankan oleh mesyuarat agung, iaitu -
- Perkara- perkara yang diputuskan oleh mesyuarat agung.*
- (a) mengesahkan minit mesyuarat agung tahunan yang terdahulu dan mana-mana mesyuarat agung khas yang berselang;
  - (b) menimbang laporan-laporan Lembaga dan Jawatankuasa Audit Dalam dan pandangan Ketua Pendaftar mengenai akaun- akaun teraudit dan laporan Lembaga Koperasi ini, (jika pandangan Ketua Pendaftar yang berkaitan dengannya yang disebutkan di bawah subperaturan 30(1) dan (2) Peraturan dan perenggan 59(1)(e) Akta belum lagi diterima oleh Koperasi, pandangan tersebut hendaklah dibentangkan di mesyuarat agung tahunan berikutnya);
  - (c) menimbang dan meluluskan akaun-akaun teraudit Koperasi dan subsidiari atau subsidiari-subsidiarinya, jika ada, cadangan pembahagian keuntungan dan laporan juruaudit Koperasi ini;
  - (d) memilih anggota-anggota Lembaga dan Jawatankuasa Audit Dalam;
  - (e) menimbang dan meluluskan belanjawan

## KONTRAS – UNDANG-UNDANG KECIL

tahunan bagi tahun kewangan yang akan datang;

(f) meluluskan elaun-elaun kepada anggota-anggota Lembaga dan Jawatankuasa Audit Dalaman dan saraan kepada anggota-anggota Lembaga yang dilantik sebagai pengarah bagi subsidiari atau subsidiari-subsidiari Koperasi ini, jika ada;

(g) meluluskan suatu panel yang terdiri daripada tidak kurang daripada dua firma audit untuk dipilih salah satu daripadanya bagi mengaudit akaun-akaun Koperasi;

(h) menimbang dan meluluskan skop dan had pelaburan daripada wang berlebihan Koperasi ini;

(i) menetapkan had maksimum keterhutangan Koperasi ini;

(j) melantik suatu jawatankuasa yang terdiri daripada enam orang anggota dan empat orang anggota Lembaga untuk menentusahkan draf minit mesyuarat agung tahunan itu;

(k) mengisytihar atau menerbitkan syer-syer bonus;

(l) mendengar, menimbang atau memutuskan apa-apa urusan lain Koperasi ini yang baginya suatu notis tidak kurang daripada tujuh hari telah diberikan;

(m) menimbang dan meluluskan apa-apa cadangan pindaan kepada Undang-undang Kecil Koperasi ini;

(n) mendengar dan memutuskan apa-apa aduan daripada mana- mana anggota yang terkilan dengan sesuatu keputusan Lembaga, dengan syarat suatu notis yang tidak kurang daripada tujuh hari telah diberikan kepada Koperasi mengenainya;

## KONTRAS – UNDANG-UNDANG KECIL

(o) meluluskan apa-apa perbelanjaan bagi perlantikan orang-orang yang kompeten bagi membantu Jawatankuasa Audit Dalaman; dan

(p) menimbang dan meluluskan apa-apa laporan yang hendak dikemukakan menurut kehendak Akta dan Peraturan.

(2) Perkara-perkara di dalam perenggan (a), (b), (c), (d) dan (e) fasal (1) undang-undang kecil ini hendaklah diputuskan di dalam mesyuarat agung tahunan.

(3) Minit bagi sesuatu mesyuarat agung hendaklah dicatatkan di dalam buku minit mesyuarat yang berkenaan dan satu salinannya hendaklah diserahkan kepada Ketua Pendaftar dalam masa tiga puluh hari selepas tarikh mesyuarat agung itu, menurut perenggan 14(b) Akta.

34. (1) Seorang anggota selain daripada anggota Lembaga yang dipilih oleh majlis mesyuarat hendaklah mempengerusikan mesyuarat agung itu. *Pengerusi mesyuarat agung.*

(2) Pengerusi dengan persetujuan mesyuarat bolehlah dan, jika dikehendaki demikian oleh mesyuarat itu, hendaklah menangguhkan mesyuarat agung itu dari satu masa ke satu masa yang lain dan dari satu tempat ke satu tempat yang lain dalam kawasan operasi Koperasi tetapi mesyuarat yang ditangguhkan itu tidak boleh menjalankan apa-apa urusan lain selain daripada urusan mesyuarat yang asal. Notis tidaklah perlu bagi mesyuarat yang ditangguhkan itu.

35. Pengelolaan hal-ehwal Koperasi ini menurut perenggan 42(a) Akta, hendaklah terserah kepada satu Lembaga yang mengandungi **enam (6)** orang yang terdiri daripada anggota-anggota yang dipilih oleh mesyuarat agung menurut perenggan (d) fasal (1) undang-undang kecil 33 dan undang-undang kecil 36. *Pengelolaan Koperasi dan pengurusan.*

36. Seseorang anggota tidak layak untuk dipilih menjadi *Ketaklayakan*

## KONTRAS – UNDANG-UNDANG KECIL

anggota Lembaga, menurut seksyen 43 Akta, jika dia:- *menjadi anggota Lembaga.*

(a) telah disabitkan atas suatu kesalahan di bawah Akta; atau

(b) telah dipecat sebagai pekerja sesuatu koperasi berdaftar; atau

(c) telah dilantik sebagai anggota Jawatankuasa Audit Dalaman bagi Koperasi ini; atau

(d) ada kepentingan diri dalam mana-mana aktiviti yang diusahakan oleh Koperasi ini; atau

(e) selepas dua tahun Koperasi didaftarkan, belum genap tempoh dua tahun menjadi anggota Koperasi ini.

37. (1) Satu pertiga daripada bilangan anggota Lembaga yang dipilih di bawah undang-undang kecil 36 hendaklah menurut Peraturan, mengosongkan jawatan mereka secara bergilir-gilir pada tiap-tiap mesyuarat agung tahunan. Bagi dua tahun yang pertama, anggota-anggota Lembaga yang akan berhenti hendaklah dipilih secara mencabut undi. Mana-mana anggota yang mengosongkan jawatannya di bawah undang-undang kecil ini boleh dilantik semula. *Tempoh memegang jawatan.*

(2) Mana-mana kekosongan dalam Lembaga hendaklah dalam tempoh enam puluh hari dari hari berlakunya kekosongan itu diisi oleh Lembaga dengan melantik mana-mana anggota yang berkecualan menurut undang-undang kecil 36. Anggota yang dilantik demikian hendaklah berkhidmat sehingga mesyuarat agung tahunan yang akan datang.

38. (1) Seseorang anggota Lembaga akan lucut jawatannya dengan serta-merta jika dia: - *Lucut dan penggantungan jawatan.*

(a) disabitkan atas kesalahan boleh daftar atau kesalahan di bawah Akta atau Peraturan; atau

## KONTRAS – UNDANG-UNDANG KECIL

(b) menerima apa-apa perlantikan tetap yang bergaji dalam Koperasi ini; atau

(c) tidak hadir di dalam mesyuarat Lembaga tiga kali berturut-turut, melainkan dengan sebab-sebab yang boleh diterima oleh Lembaga yang telah dimaklumkan terlebih dahulu; atau

(d) hilang kelayakan sebagai anggota menurut undang-undang kecil 20.

(2) Menurut subseksyen 47(1) Akta, seseorang anggota Lembaga hendaklah digantung dari jawatannya jika -

(a) sesuatu langkah perbicaraan diambil terhadap anggota itu mengenai sesuatu kesalahan boleh daftar atau sesuatu kesalahan di bawah Akta atau Peraturan; atau

(b) majoriti anggota-anggota Lembaga berpuas hati bahawa anggota itu telah bertindak dengan cara yang memudaratkan kepentingan Koperasi ini menurut subperaturan 20(1) Peraturan.

(3) Tiap-tiap kes penggantungan di bawah perenggan (b) fasal (2) undang-undang kecil ini, hendaklah didengar oleh mesyuarat agung yang terawal diadakan selepas penggantungan itu dan anggota yang digantung jawatannya oleh Lembaga itu hendaklah diberi kesempatan untuk memberi penjelasannya menurut subperaturan 20(4) Peraturan, dan hendaklah tertakluk kepada pengesahan atau pengetepian oleh majoriti anggota-anggota yang hadir di dalam mesyuarat agung itu menurut subperaturan 20(3) Peraturan.

(4) Anggota yang dilucutkan atau digantung jawatannya hendaklah dengan serta-merta diberitahu secara bertulis dan, menurut subperaturan 20(2) Peraturan, hendaklah dengan segera berhenti daripada menjalankan segala hak dalam pengurusan atau

## KONTRAS – UNDANG-UNDANG KECIL

pentadbiran hal-ehwal Koperasi ini.

39. (1) Walau apa pun peruntukan fasal (1) undang-undang kecil 37, mesyuarat agung hendaklah mempunyai kuasa menurut subperaturan 16(2) Peraturan, untuk menamatkan perlantikan mana-mana anggota Lembaga yang dipilih di bawah undang-undang kecil 35 daripada jawatannya pada bila-bila masa dan memilih gantinya atau menamatkan perlantikan kesemua anggota Lembaga itu dan memilih anggota-anggota Lembaga yang baru dengan syarat bahawa usul secara bertulis untuk menamatkan perlantikan anggota Lembaga itu hendaklah disampaikan kepada Koperasi sekurang-kurangnya tujuh hari sebelum mesyuarat agung itu diadakan. *Menamatkan perlantikan oleh mesyuarat agung.*
- (2) Keputusan untuk menamatkan perlantikan seseorang atau kesemua anggota Lembaga hanya boleh dibuat selepas mesyuarat agung itu mendengar penjelasan anggota atau anggota-anggota yang terlibat.
- (3) Anggota yang ditamatkan perlantikannya di bawah undang-undang kecil ini tidak boleh dilantik semula sehingga mesyuarat agung tahunan yang akan datang.
40. (1) Mesyuarat Lembaga yang pertama selepas mesyuarat agung tahunan hendaklah diadakan sebaik sahaja selesai mesyuarat agung itu. *Mesyuarat Lembaga.*
- (2) Mesyuarat Lembaga yang berikutnya hendaklah diadakan sekurang-kurangnya sekali dalam tempoh **tiga (3) bulan**.
- (3) Mesyuarat Lembaga hendaklah juga diadakan sekiranya Ketua Pendaftar mengeluarkan arahan atau jika satu per tiga (1/3) daripada keseluruhan anggota Lembaga membuat permintaan dengan bertulis menyatakan perkara-perkara yang hendak dibincangkan. *Kuorum mesyuarat*
41. Kuorum mesyuarat Lembaga hendaklah sekurang-kurangnya *Kuorum mesyuarat*

## KONTRAS – UNDANG-UNDANG KECIL

kurangnya seramai tiga (3) orang.

*Lembaga.*

42. Urusan-urusan mesyuarat Lembaga hendaklah *Urusan mesyuarat*  
termasuk: - *Lembaga.*

- (a) mengesahkan minit mesyuarat yang lalu;
- (b) membincangkan perkara-perkara terbabit;
- (c) mengkaji, membincang, menimbang dan di mana berkenaan, memutuskan perkara-perkara berikut:
  - (i) keputusan-keputusan mesyuarat agung dan menentukan tindakan-tindakan;
  - (ii) laporan Jawatankuasa Audit Dalam;
  - (iii) laporan pengurusan termasuk pengurusan buku-buku;
  - (iv) permohonan menjadi anggota Koperasi;
  - (v) permohonan berhenti daripada menjadi anggota;
  - (vi) permohonan pembiayaan daripada anggota-anggota;
  - (vii) permohonan menambah atau mengurangkan ansuran pembiayaan;
  - (viii) permohonan menambah atau mengurangkan caruman syer atau yuran;
- (d) membentang dan meluluskan akaun kewangan bulanan;
- (e) mengkaji projek-projek Koperasi yang lama dan yang sedang dilaksanakan;



## KONTRAS – UNDANG-UNDANG KECIL

(f) mengkaji, membincang dan memutuskan cadangan projek- projek baru;

(g) mengkaji dan membincangkan: -

(i) perkara-perkara perjawatan;

(ii) program latihan pekerja;

(iii) program pendidikan anggota-anggota;  
dan

(h) menjalankan apa-apa urusan lain yang baginya notis tidak kurang daripada tujuh hari telah diberikan.

43. (1) Semua usul dan cadangan hendaklah diputuskan dengan majoriti mudah undi anggota-anggota Lembaga yang hadir. Jika undi sama banyak, maka usul atau cadangan yang diundi itu hendaklah disifatkan kalah atau gugur. *Undi anggota Lembaga.*

(2) Seseorang anggota Lembaga tidak boleh mengundi dalam mana- mana perkara mengenai dirinya sendiri atau perkara yang di dalamnya ia ada kepentingan peribadi. Seseorang anggota Lembaga yang ada kepentingan peribadi dalam apa-apa perkara yang akan dipertimbangkan oleh mesyuarat hendaklah mengisytiharkan sepenuhnya kepada Lembaga mengenai penglibatan atau kepentingan dirinya dalam perkara itu.

44. (1) Segala keputusan mesyuarat Lembaga hendaklah dalam tempoh tujuh (7) hari dicatatkan dalam buku minit mesyuarat yang berkenaan dan ditandatangani oleh setiausaha mesyuarat itu dan hendaklah dalam tempoh empat belas (14) hari dikelilingkan kepada anggota-anggota Lembaga. Minit-minit itu setelah disahkan dalam mesyuarat yang berikutnya hendaklah ditandatangani pula oleh pengerusi mesyuarat itu. *Buku minit mesyuarat Lembaga.*

(2) Minit bagi sesuatu mesyuarat Lembaga hendaklah diserahkan kepada Ketua Pendaftar tidak lewat

## KONTRAS – UNDANG-UNDANG KECIL

daripada tiga puluh hari selepas tarikh mesyuarat itu, menurut perenggan 14(b) Akta.

45. (1) Menurut seksyen 44 Akta, Lembaga pada umumnya adalah bertanggungjawab untuk memastikan pentadbiran serta pengurusan Koperasi dikendalikan dengan teratur. *Kuasa dan kewajipan Lembaga.*

(2) Bagi melaksanakan tanggungjawab di bawah fasal (1) itu Lembaga hendaklah mempunyai kuasa-kuasa dan kewajipan-kewajipan yang berikut:

(a) melantik di antara anggota-anggotanya di dalam mesyuarat Lembaga yang diadakan di bawah fasal (1) undang-undang kecil 40, seorang pengerusi, seorang setiausaha dan seorang bendahari;

(b) mengemukakan kepada Ketua Pendaftar suatu senarai anggota Lembaga yang mengandungi butir-butir seperti nama, alamat kediaman, nombor kad pengenalan, tarikh keanggotaan dan pekerjaan mengikut perenggan 14(a) Akta, dan memberitahu Ketua Pendaftar apa-apa perubahan tentang butir-butir berkenaan secara bertulis dalam tempoh lima belas hari dari tarikh berlakunya perubahan tersebut;

(c) menerima masuk anggota-anggota baru;

(d) meluluskan dan mengesahkan pemindahan dan penebusan syer-syer;

(e) jika perlu, melantik seorang pegawai yang bergaji tetap atau sebuah firma bagi menjalankan sebahagian daripada kewajipan setiausaha, disyaratkan pegawai yang dilantik itu tidak boleh menjadi anggota Lembaga;

(f) menyenggara dengan benar dan betulnya semua akaun bagi semua wang yang diterima dan yang dibelanjakan atas nama Koperasi;

## KONTRAS – UNDANG-UNDANG KECIL

(g) menyenggara dengan betulnya semua akaun berkenaan dengan aset-aset dan liabiliti-liabiliti Koperasi;

(h) membenarkan perbelanjaan-perbelanjaan dan menyemak serta mengawasi supaya semua akaun, buku daftar dan dokumen Koperasi yang disenggarakan itu diuruskan dengan sempurna dan dikemaskinikan;

(i) membentangkan kepada mesyuarat agung tahunan akaun perdagangan, akaun untung rugi, penyata sumber-sumber dan penggunaan wang serta kunci kira-kira, laporan Lembaga berkenaan dengan kedudukan hal-ehwal Koperasi serta subsidiari atau subsidiari-subsidiarinya yang telah dikemukakan untuk pandangan Ketua Pendaftar serta laporan juruaudit;

(j) membuat perakuan kepada mesyuarat agung tahunan mengenai pembahagian keuntungan atau pengisytiharan syer bonus Koperasi;

(k) menimbangkan penyata-penyata dan surat-surat arahan Ketua Pendaftar atau wakilnya dan mengambil tindakan-tindakan yang sewajar ke atasnya;

(l) memenuhi jawatan-jawatan kosong yang berlaku di dalam Lembaga, menggantung keanggotaan anggota-anggota dan anggota Lembaga serta melucutkan jawatan-jawatan anggota Lembaga;

(m) memanggil mesyuarat-mesyuarat agung mengikut Undang-undang Kecil;

(n) membuat perjanjian bagi mendapatkan pembiayaan-pembiayaan tertakluk kepada kelulusan mesyuarat agung;

(o) dengan mengeluarkan surat-surat rasmi, melantik, menggantung, membuang kerja,

## KONTRAS – UNDANG-UNDANG KECIL

menetapkan kewajiban pekerja-pekerja termasuk pengurus, menetapkan gaji dan bayaran-bayaran lain bagi mereka dan mendapatkan jaminan yang cukup bagi kesempurnaan menjalankan kewajiban mereka;

(p) bertindak atas nama dan bagi pihak Koperasi bagi menyelesaikan segala pertikaian mengenai urusan Koperasi ini atau menerusi seseorang yang dilantik secara bertulis menjalankan atau memberhentikan mana-mana tindakan mahkamah;

(q) melabur wang berlebihan menurut keputusan mesyuarat agung dan tertakluk kepada peruntukan Akta dan Peraturan;

(r) mengkaji dan merancangkan projek-projek yang difikirkan akan memberi manfaat kepada anggota-anggota dan melaksanakan projek-projek itu mengikut keputusan mesyuarat agung di mana perlu;

(s) menjalankan rancangan-rancangan atau projek-projek dan mempelawa anggota-anggota Koperasi ini mengambil bahagian dengan menyumbangkan modal tambahan atau simpanan khas sebagaimana yang dipersetujui;

(t) mengikat perjanjian atau memberi indemniti bagi pihak Koperasi yang mana hendaklah dimeteraikan dengan mohor Koperasi dan ditandatangani oleh pengerusi, setiausaha dan bendahari atau seperti yang ditetapkan oleh Lembaga;

(u) melantik di antara anggota-anggotanya bagi menghadiri mesyuarat mana-mana koperasi yang Koperasi ini menjadi anggotanya;

(v) menubuhkan apa-apa jawatankuasa jika perlu, bagi menjalankan dengan sempurnanya mana-mana aktiviti Koperasi dan mewakili kuasa

## KONTRAS – UNDANG-UNDANG KECIL

kepadanya dari semasa ke semasa mengikut keputusan Lembaga;

(w) membuat aturan-aturan aktiviti dari semasa ke semasa bagi kesempurnaan pelaksanaan apa-apa aktiviti Koperasi dengan kelulusan mesyuarat agung dan mengemukakan satu salinannya kepada Ketua Pendaftar;

(x) mencadangkan dengan secara dibutirkan satu persatu kepada mesyuarat agung elaan-elaun kepada anggota-anggota Lembaga dan Jawatankuasa Audit Dalaman dan saran kepada anggota- anggota Lembaga yang dilantik sebagai pengarah bagi subsidiari atau subsidiari-subsidiari Koperasi, jika ada; dan

(y) melaksanakan kewajipan-kewajipan lain yang perlu sebagaimana yang ditentukan di dalam Akta, Peraturan, Undang-undang Kecil dan mesyuarat agung anggota.

46. Menurut seksyen 45 Akta, Lembaga hendaklah berhemat dan bertekun seperti ahli-ahli perniagaan yang biasa dan hendaklah bertanggung secara bersesama dan berasingan bagi apa-apa kerugian yang ditanggung oleh Koperasi oleh sebab kegagalan mereka berhemat dan bertekun sedemikian atau oleh sebab apa-apa perbuatan yang bertentangan dengan peruntukan-peruntukan Akta, Peraturan, Undang-undang Kecil ini serta aturan-aturan aktiviti yang dibuat di bawahnya atau arahan mesyuarat agungnya. *Liabiliti anggota Lembaga.*
47. Pengerusi hendaklah menjalankan kewajipan-kewajipan yang berikut: - *Kewajipan Pengerusi.*
- (a) mempengerusikan semua mesyuarat Lembaga;
- (b) menandatangani minit mesyuarat yang disahkan dan memperakui bersama setiausaha melalui satu akuan yang ditarik dan ditandatangani, cabutan-cabutan dan salinan-

## KONTRAS – UNDANG-UNDANG KECIL

salinan dari rekod-rekod Koperasi menurut peraturan 9 Peraturan;

(c) memanggil sendiri atau melalui setiausaha, mesyuarat- mesyuarat Lembaga bila-bila perlu;

(d) mengarahkan Jawatankuasa Audit Dalaman supaya mengaudit akaun Koperasi pada bila-bila masa dan melaporkan kepadanya;

(e) menandatangani bersama dua anggota Lembaga permohonan bagi didaftarkan pindaan kepada Undang-undang Kecil dan dokumen-dokumen lain yang berkaitan; dan

(f) menyelia secara am pentadbiran, hal ehwal dan pekerja Koperasi ini.

48. (1) Setiausaha hendaklah menjalankan kewajipan-kewajipan yang berikut: - *Kewajipan setiausaha.*

(a) memanggil dan menghadiri mesyuarat agung, mesyuarat- mesyuarat Lembaga dan mesyuarat-mesyuarat jawatankuasa dan menyampaikan segala laporan dan dokumen untuk pertimbangan mesyuarat-mesyuarat itu;

(b) merekodkan perjalanan dan meminitkan keputusan sesuatu mesyuarat;

(c) menyenggarakan dengan betul dan mengemaskinikan semua daftar anggota, daftar penama, buku-buku dan laporan-laporan yang dikehendaki oleh Lembaga;

(d) menjalankan kerja-kerja surat-menyurat sebagaimana yang diarahkan oleh Lembaga;

(e) mengesahkan bersama pengerusi salinan-salinan segala perkara yang bertulis di dalam buku-buku Koperasi;

## KONTRAS – UNDANG-UNDANG KECIL

(f) menyimpan dan menjaga dengan selamatnya mohor Koperasi; dan

(g) menjalankan apa-apa tugas lain yang ditentukan oleh Lembaga ke atasnya dari semasa ke semasa.

(2) Kewajipan setiausaha di bawah fasal (1), kecuali yang dinyatakan di perenggan-perenggan (a), (b), (e) dan (f) undang-undang kecil ini, bolehlah diwakilkan kepada pengurus jika seorang pengurus telah dilantik.

49. (1) Bendahari hendaklah menjalankan kewajipan-kewajipan yang berikut: - *Kewajipan bendahari.*

(a) mengendalikan segala urusan perdagangan dan perindustrian Koperasi mengikut dasar yang ditetapkan oleh Lembaga;

(b) mengawasi kecekapan, tatatertib dan daya usaha semua pegawai dan pekerja Koperasi dalam menunaikan tugas-tugas dan tanggungjawab mereka;

(c) menerima dan menjaga semua wang yang diterima oleh Koperasi dan membuat pembayaran mengikut arahan-arahan Lembaga;

(d) menyimpan ke dalam bank atas nama Koperasi semua wang yang diterima dalam masa dua puluh empat jam daripada penerimaannya;

(e) mengeluarkan resit-resit, menyediakan baucar-baucar dan surat-surat lain mengikut arahan-arahan Lembaga;

(f) menyimpan dalam Akaun Wang Runcit, wang sebanyak yang diluluskan oleh Lembaga untuk memenuhi perbelanjaan runcit dan perbelanjaan yang dibuat daripada akaun ini boleh diganti seberapa kerap yang perlu;

(g) menyenggara dan menyimpan akaun-akaun

## KONTRAS – UNDANG-UNDANG KECIL

Koperasi dan menyediakan segala-galanya dengan sempurna dan kemaskini supaya dapat diperiksa pada bila-bila masa oleh pihak berkuasa yang berkenaan;

(h) menyediakan akaun tahunan dan laporan tahunan Koperasi untuk dibentang dalam mesyuarat Lembaga;

(i) menyediakan anggaran belanjawan tahunan Koperasi dalam bentuk yang menunjukkan dengan jelas segala butiran pendapatan dan perbelanjaan untuk ditimbang oleh Lembaga sebelum dibentangkan kepada mesyuarat agung tahunan; dan

(j) menyediakan penyata pendapatan dan perbelanjaan Koperasi yang benar dengan secara dibutirkan satu persatu bagi sesuatu tempoh sebagaimana yang dikehendaki oleh Lembaga untuk dibandingkan dengan anggaran bagi tempoh berkenaan yang telah diluluskan oleh mesyuarat agung.

(2) Mana-mana satu atau lebih daripada kewajipan-kewajipan bendahari itu bolehlah, tertakluk kepada persetujuan Lembaga, diamanahkan kepada pengurus sekiranya seorang pengurus dilantik oleh Koperasi.

50. Jawatankuasa Audit Dalaman Koperasi ini menurut perenggan 42(b) Akta hendaklah mengandungi dua (2) orang, terdiri daripada anggota-anggota yang dipilih oleh mesyuarat agung tahunan menurut perenggan (d) fasal (1) undang-undang kecil 33. *Jawatankuasa audit dalaman.*
51. Seseorang anggota tidak layak untuk dipilih menjadi anggota Jawatankuasa Audit Dalaman menurut seksyen 43 Akta, jika dia – *Ketaklayakan Jawatankuasa Audit Dalaman.*
- (a) telah disabitkan atas suatu kesalahan di bawah Akta; atau
- (b) telah dipecat sebagai pekerja mana-mana



## KONTRAS – UNDANG-UNDANG KECIL

koperasi; atau

- (c) telah menjadi anggota Lembaga Koperasi ini.
52. (1) Semua anggota Jawatankuasa Audit Dalaman ini hendaklah berhenti pada tiap-tiap mesyuarat agung tahunan. *Tempoh memegang jawatan.*
- (2) Kekosongan dalam Jawatankuasa Audit Dalaman hendaklah dalam tempoh enam puluh hari dari tarikh pengosongan jawatan diisi oleh jawatankuasa ini dengan melantik mana-mana anggota yang layak.
53. (1) Jawatankuasa Audit Dalaman hendaklah mempunyai kuasa yang diberi di bawah seksyen 49 Akta, untuk memeriksa segala rekod perakaunan dan rekod lain yang berhubungan secara langsung atau tidak langsung dengan Koperasi ini dan subsidiari atau subsidiari-subsidiarinya bagi memastikan hal-ehwal Koperasi dijalankan mengikut matlamat penubuhan, Undang-undang Kecil serta keputusan mesyuarat agung. *Kuasa dan kewajipan Jawatankuasa Audit Dalaman.*
- (2) Jawatankuasa Audit Dalaman hendaklah -
- (a) memastikan adanya kuasa dan keesahan bagi segala perbelanjaan;
  - (b) memeriksa akaun-akaun Koperasi atau melantik orang-orang yang kompeten untuk memeriksa akaun-akaun itu pada lat-lat masa yang tetap yang tidak boleh kurang daripada sekali dalam tempoh tiga bulan;
  - (c) memberitahu Lembaga apa-apa ketakselarasan yang berlaku dalam pengurusan Koperasi ini dengan sertamerta;
  - (d) mengemukakan kepada mesyuarat agung tahunan, laporan mengenai pengurusan dan hal ehwal Koperasi ini termasuk

## KONTRAS – UNDANG-UNDANG KECIL

pelanggaran terhadap Akta atau Peraturan atau Undang-undang Kecil; dan

- (e) pada setiap masa, mempunyai akses kepada segala buku, akaun dan dokumen Koperasi ini dan mana-mana orang yang dikehendakinya supaya mengemukakan apa-apa maklumat atau buku-buku, akaun-akaun dan dokumen-dokumen sedemikian hendaklah mematuhi kehendak itu.

(3) Segala kos dan perbelanjaan yang dilakukan oleh Jawatankuasa ini dalam menjalankan tugas-tugas, fungsi-fungsi serta tanggungjawabnya hendaklah ditanggung oleh Koperasi.

(4) Jawatankuasa Audit Dalam menurut subperaturan 32(2) Peraturan hendaklah bersidang dan membuat syornya kepada Lembaga tidak kurang daripada dua kali tiap-tiap tahun dan laporan-laporan hendaklah dikemukakan kepada Ketua Pendaftar.

## BAHAGIAN VI

### ASET DAN WANG KOPERASI

54. (1) Kumpulan wang koperasi ini, menurut seksyen 50 Akta, mengandungi: - *Wang dan kumpulan wang Koperasi.*
- (a) syer dan yuran anggota;
  - (b) simpanan khas daripada anggota-anggota;
  - (c) pembiayaan daripada anggota dan bukan anggota;
  - (d) Kumpulan Wang Rizab;
  - (e) Akaun Rizab Modal;
  - (f) Kumpulan Wang Penebusan Syer;

## KONTRAS – UNDANG-UNDANG KECIL

- (g) derma dan pemberian tertentu;
- (h) baki keuntungan terkumpul; dan
- (i) kumpulan wang lain yang diluluskan oleh mesyuarat agung.

(2) Kumpulan wang Koperasi ini selain daripada Kumpulan Wang Rizab bolehlah digunakan bagi melaksanakan aktiviti-aktiviti yang diperuntukkan dibawah fasal (1) undang-undang kecil 9.

55. (1) Bagi maksud perenggan 50(b) Akta, setiap anggota hendaklah melanggan satu ribu (1000) ringgit syer minimum yang hendaklah dijelaskan dalam tempoh tiga (3) bulan dan tidak boleh dikeluarkan kecuali selepas keanggotaan anggota itu tamat. *Modal Syer.*

(2) Seseorang penama atau wasi yang menyambung keanggotaan anggota yang mati hendaklah mengambil jumlah syer yang dimiliki oleh anggota yang digantikannya itu tertakluk kepada had yang ditetapkan di bawah fasal (3) undang-undang kecil ini.

(3) Pemilikan syer seseorang anggota dalam modal Koperasi ini menurut seksyen 33 Akta tidaklah boleh melebihi satu perlima daripada jumlahnya pada bila-bila masa.

(4) Mana-mana anggota yang gagal untuk melanggan syer minimum di dalam tempoh yang ditetapkan menurut fasa (1) di atas boleh disingkirkan.

56. Yuran bulanan anggota seperti yang diperuntukkan di bawah perenggan 50(c) Akta hendaklah sekurang-kurangnya tiga puluh (30) ringgit sebulan. Tiap-tiap anggota adalah diminta untuk membuat bayaran yuran yang lebih mengikut aturan jimat-cermat dan pinjam-meminjam yang dibuat oleh Lembaga dengan kelulusan mesyuarat agung. *Yuran.*

57. Seseorang anggota boleh memindahkan kepada *Pindahan Syer.*

## KONTRAS – UNDANG-UNDANG KECIL

anggota-anggota lain syer-syernya yang melebihi sumbangan minimum di bawah fasal (1) undang-undang kecil 55, akan tetapi pindahan tersebut tidak akan berkuatkuasa sehingga borang pemindahan telah ditandatangani oleh anggota lain itu dan didaftarkan oleh Koperasi. Syer-syer seseorang anggota yang mati bolehlah dipindahkan kepada penama atau wasinya apabila penama atau wasi itu disahkan menjadi anggota atau kepada sesiapa yang dinamakan oleh penama atau wasi itu dalam masa enam bulan selepas kematian anggota itu, sepertimana yang diperuntukkan di bawah seksyen 24 Akta.

58. (1) Jika bagi seseorang anggota yang tamat keanggotaannya oleh apa-apa sebab jua pun pemindahan tidak dapat dibuat menurut undang-undang kecil 57, maka syer-syernya yang diperihalkan di dalam undang-undang kecil itu bolehlah ditebus oleh Koperasi tertakluk kepada fasal (2) undang-undang kecil ini.
- (2) Syer-syer boleh ditebus hanya dari Kumpulan Wang Penebusan Syer. Nilai tebusan syer-syer ini hendaklah mengikut sebagaimana yang ditunjukkan dalam akaun teraudit terakhir bagi Koperasi ini akan tetapi tidaklah boleh melebihi nilai asalnya.
- (3) Syer-syer yang ditebus di bawah fasal (1) undang-undang kecil ini bolehlah, jika diluluskan oleh mesyuarat agung, diterbitkan semula sebagai syer bonus.
- (4) Tanpa mengambil kira undang-undang kecil 58 ini, seseorang anggota berhak melupuskan syer dengan menjual syer kepada mana-mana anggota yang lain dengan syarat bahawa segala pelupusan syer anggota hendaklah mendapat kebenaran bertulis Koperasi sebelum pelupusan tersebut dilakukan
59. (1) Menurut seksyen 55 Akta, semua keuntungan modal yang diperolehi daripada -
- (a) penjualan tanah atau bangunan, atau kedua-

*Penyelesaian modal syer.*

*Keuntungan modal.*

## KONTRAS – UNDANG-UNDANG KECIL

duanya sebagai aset tetap; dan

- (b) penilaian semula tanah atau bangunan, atau kedua-duanya, sebagai aset tetap, dengan kelulusan Ketua Pendaftar;

hendaklah dikreditkan ke Akaun Rizab Modal.

(2) Keuntungan modal yang disebutkan di dalam perenggan (a) fasal (1) undang-undang kecil ini bolehlah, jika diluluskan oleh mesyuarat agung, digunakan bagi semua atau mana-mana maksud yang berikut:

- (a) penerbitan syer bonus;
- (b) penghapusan kira kerugian terkumpul;
- (c) penghapusan kira kerugian modal; dan
- (d) pewujudan suatu Kumpulan Wang Penebusan Syer Bonus.

(3) Syer bonus boleh diterbitkan menurut tatacara di bawah peraturan 25 Peraturan berasaskan kepada jumlah syer yang dipegang oleh tiap-tiap anggota pada masa dua belas bulan sebelum tarikh pengisytiharan syer bonus itu dan dalam hal penerbitan semula daripada syer bonus yang ditebus semula, dua belas bulan sebelum tarikh pengisytiharan itu, dengan syarat: -

- (a) nama anggota yang akan menerima itu ada dalam daftar Koperasi pada tarikh pengisytiharan syer bonus itu;
- (b) semua kerugian terkumpul dan semasa telah dihapus kira;
- (c) buku-buku dan rekod-rekod Koperasi telah disenggarakan dengan memuaskan menurut pandangan Ketua Pendaftar.

## KONTRAS – UNDANG-UNDANG KECIL

(4) Syer bonus tidak boleh dikeluarkan tetapi boleh, dengan kelulusan Lembaga, dipindahkan kepada anggota lain atau, dalam hal anggota yang mati selepas syer bonus itu dikeluarkan, dibayar daripada Kumpulan Wang Penebusan Syer Bonus.

60. (1) Koperasi ini hendaklah mewujudkan dan menyenggarakan satu Kumpulan Wang Rizab menurut subseksyen 57(1) Akta yang kepadanya tidak kurang daripada lima belas peratus daripada keuntungan bersih terauditnya hendaklah dikreditkan. *Kumpulan wang rizab.*

(2) Kumpulan Wang Rizab ini tidak boleh dibahagi-bahagikan dan tiada anggota yang berhak untuk menuntut apa-apa bahagian tertentu daripadanya.

61. (1) Koperasi bolehlah menurut peruntukan perenggan 50(d) Akta, menerima simpanan khas tertakluk kepada terma-terma dan syarat-syarat yang dibuat mengikut fasal (4) undang-undang kecil 9. *Simpanan khas, deposit atau pembiayaan.*

(2) Koperasi boleh menerima daripada anggotanya -

(a) simpanan khas seperti yang ditetapkan dalam aturan-aturannya dan wang ini boleh dikeluarkan dari semasa ke semasa; atau

(b) deposit, pelaburan dan pembiayaan.

(3) Koperasi boleh, dengan kelulusan Suruhanjaya, menerima deposit atau pembiayaan daripada bukan anggota Koperasi.

(4) Fasal (3) tidak terpakai kepada deposit atau pembiayaan yang diberikan oleh kerajaan.

(5) Pada setiap mesyuarat agung perwakilan tahunan, Koperasi hendaklah:-

(a) memberitahu perwakilannya mengenai pembiayaan daripada anggota menurut subseksyen 52(3) Akta; dan

## KONTRAS – UNDANG-UNDANG KECIL

- (b) menetapkan had maksimum keterhutangan yang sedia ada dan yang baru akan ditanggung dalam tahun akan datang.
62. (1) Tertakluk kepada kelulusan mesyuarat agung, seperti yang dinyatakan di bawah seksyen 52 Akta, Koperasi bolehlah meminjam wang daripada anggota dan bukan anggotanya untuk digunakan bagi maksud yang khas dalam perniagaannya. Bagi maksud yang sama juga, Koperasi boleh mendapatkan pelaburan daripada anggota atau pihak ketiga bagi tujuan suatu perniagaan spesifik Koperasi dengan syarat bahawa pulangan pelaburan tersebut hendaklah dibuat di atas keuntungan perniagaan tersebut sahaja. *Pembiayaan luar dan pelaburan pihak ketiga.*
- (2) kesemua pembiayaan atau pelaburan yang dimohon atau diterima oleh Koperasi hendaklah merupakan Pembiayaan atau Pelaburan Patuh Syariah.
- (3) Koperasi ini hendaklah setiap tahun menentukan di dalam mesyuarat agungnya had maksimum keterhutangan berkenaan dengan pembiayaan yang sedia ada dan yang baru yang akan ditanggung dalam tahun yang akan datang.
63. (1) Wang berlebihan Koperasi ini bolehlah dilabur atau didepositkan ke dalam akaun atau pelaburan patuh Syariah menurut peruntukan seksyen 54 Akta. *Pelaburan wang.*
- (2) Had maksimum yang boleh dilaburkan oleh Koperasi bagi sesuatu maksud hendaklah ditentukan oleh mesyuarat agung.
64. Menurut subseksyen 51(1) Akta, Koperasi ini bolehlah memberikan apa-apa pembiayaan atau kemudahan kredit Patuh Syariah kepada: - *Pemberian pembiayaan oleh Koperasi.*
- (a) anggota-anggotanya, tertakluk kepada terma-terma dan syarat-syarat yang ditetapkan dalam aturan-aturan yang diluluskan oleh mesyuarat agung;

## KONTRAS – UNDANG-UNDANG KECIL

- (b) pekerja-pekerjanya, tertakluk kepada terma-terma dan syarat-syarat gunakhidmat mereka dan peruntukan peraturan 21 Peraturan; atau
- (c) subsidiari atau subsidiari-subsiadarnya atau koperasi berdaftar lain, tertakluk kepada kelulusan Ketua Pendaftar.

65. (1) Keuntungan bersih teraudit Koperasi ini seperti yang ditunjukkan dalam akaun untung rugi menurut seksyen 56 Akta hendaklah diagihkan menurut subseksyen 57(1) dan (2) Akta seperti berikut - *Pengagihan untung bersih teraudit.*

(a) tidak kurang daripada lima belas peratus dibayar kepada Kumpulan Wang Rizab; dan

(b) sebanyak mana yang ditentukan dari semasa ke semasa oleh Menteri dibayar kepada Kumpulan Wang Amanah Pendidikan Koperasi Kumpulan Wang Amanah Pembangunan Koperasi;

disyaratkan bahawa menurut subseksyen 57(4) Akta, bolehlah ditolak apa-apa bayaran yang dibuat menurut perenggan (b) daripada jumlah wang yang disebutkan di dalam perenggan (a).

(2) Selepas pengagihan mengikut fasal (1) undang-undang kecil ini, dan peruntukan cukai pendapatan jika ada, baki untung bersih teraudit, termasuk baki keuntungan yang belum dibahagi-bahagikan menurut subseksyen 57(5) Akta bolehlah digunakan bagi semua atau mana-mana maksud yang berikut:

- (a) potongan kerana langganan;
- (b) pulangan atas simpanan khas;
- (c) dividen atas syer atau yuran;
- (d) bayaran honorarium kepada anggota Lembaga;



## KONTRAS – UNDANG-UNDANG KECIL

- (e) peruntukan sebanyak tidak lebih sepuluh peratus daripada untung bersih teraudit bagi apa-apa maksud kebajikan yang diluluskan oleh mesyuarat agung; dan
- (f) peruntukan kepada kumpulan wang lain yang diwujudkan menurut fasal (1) undang-undang kecil 54.

(3) Menurut subseksyen 57(7) Akta, bayaran kepada perkara-perkara di bawah perenggan (b) fasal (1) dan fasal (2) undang-undang kecil ini boleh dibuat hanya jika semua kerugian terkumpul telah dihapus kira sepenuhnya.

(4) Dengan kelulusan Ketua Pendaftar, Koperasi ini boleh, sekiranya kerugian terkumpul tidak dihapus kira sepenuhnya, menggunakan untung bersih terauditnya untuk pembayaran dividen kepada anggota-anggotanya tidak boleh melebihi lima peratus daripada jumlah syer atau yuran anggota atau kedua-duanya sepertimana yang dinyatakan di bawah subseksyen 57(8) Akta.

66. (1) Kadar dividen yang dibayar atas syer-syer atau yuran kepunyaan tiap-tiap anggota seperti pada enam bulan sebelum akhir tahun kewangan, mengikut peraturan 24 Peraturan hendaklah tidak melebihi lima belas peratus kecuali dengan kelulusan Ketua Pendaftar. Seseorang yang namanya tidak ada dalam daftar nama anggota Koperasi ini pada tarikh akhir tahun kewangan yang berkenaan tidak layak untuk mendapat dividen. *Dividen, potongan kerana langganan dan lain-lain.*
- (2) Dividen hendaklah dikreditkan ke akaun modal syer anggota sekiranya anggota itu tidak meminta dibayar kepadanya secara tunai dalam tempoh tiga puluh hari dari tarikh dividen itu diisytiharkan.
- (3) Potongan kerana langganan boleh diberikan hanya jika langganan seseorang anggota tidak kurang daripada satu ribu (1000) ringgit dalam tahun

## KONTRAS – UNDANG-UNDANG KECIL

kewangan yang berkenaan.

### BAHAGIAN VII

#### AKAUN DAN AUDIT

67. Tahun kewangan Koperasi ini bermula pada satu (1) haribulan Oktober dan berakhir pada tiga puluh (30) haribulan September. *Tahun Kewangan.*
68. (1) Lembaga hendaklah menentukan bahawa rekod-rekod akaun dan rekod-rekod lain disimpan dengan sempurna dan kemaskini menurut seksyen 58 Akta, mengenai – *Penyenggaraan buku-buku dan audit.*
- (a) tiap-tiap transaksi Koperasi ini dan subsidiari atau subsidiari- subsidiarinya, jika ada;
  - (b) aset-aset tetap dan pelaburan-pelaburan Koperasi ini dan subsidiari atau subsidiari- subsidiarinya, jika ada;
  - (c) deposit-deposit yang dibuat oleh Koperasi ini dan subsidiari atau subsidiari- subsidiarinya, jika ada;
  - (d) syer, yuran serta simpanan khas yang dicarum oleh anggota- anggota; dan
  - (e) rekod-rekod dan daftar-daftar lain sebagaimana yang dikehendaki oleh Ketua Pendaftar.
- (2) Bagi memastikan bahawa kesemua rekod-rekod perakaunan dapat diaudit dalam tempoh yang ditetapkan, Lembaga bolehlah melantik mana-mana individu atau firma untuk mengemaskinikan rekod-rekod tersebut dengan bayaran upah yang berpatutan.
- (3) Menurut subseksyen 58(4) Akta, rekod-rekod akaun hendaklah disimpan di ibu pejabat Koperasi

## KONTRAS – UNDANG-UNDANG KECIL

pada sepanjang masa melainkan jika Ketua Pendaftar mengarahkan supaya disimpan di tempat lain dan hendaklah disimpan oleh Koperasi selama enam tahun selepas diaudit seperti yang dinyatakan di bawah subperaturan 29(3) Peraturan.

(4) Rekod-rekod ini boleh diperiksa oleh anggota-anggota pada bila-bila masa mengikut syarat-syarat mengenai pemeriksaan sebagaimana yang ditetapkan oleh Lembaga.

(5) Catatan dalam akaun-akaun Koperasi dan subsidiari atau subsidiari-subsidiarinya, menurut subseksyen 58(2) Akta hendaklah dibuat dengan seberapa segera yang mungkin tetapi tidak lewat daripada tiga puluh hari selepas sesuatu transaksi. Penyediaan akaun-akaun bagi sesuatu tahun kewangan hendaklah dibuat dengan seberapa segera tetapi tidak lewat daripada dua bulan selepas tamatnya tahun kewangan itu supaya akaun-akaun itu dapat diaudit dan dibentangkan di dalam mesyuarat agung tidak lewat daripada enam bulan selepas tamatnya tahun kewangan itu.

(6) Butir-butir terperinci perbelanjaan Lembaga dan pembayaran- pembayaran kepada tiap-tiap anggota Lembaga dan anggota jawatankuasa-jawatankuasa termasuk Jawatankuasa Audit Dalam hendaklah dimaklumkan kepada mesyuarat agung melalui nota-nota kepada akaun untung rugi sepertimana yang dikehendaki di bawah subperaturan 29(2) Peraturan.

(7) Ketua Pendaftar boleh menurut subseksyen 58(5) Akta, dalam kes-kes tertentu memerintahkan supaya rekod perakaunan Koperasi diserahkan untuk diperiksa oleh seseorang juruaudit yang bertindak bagi pihak seseorang anggota atau pegawai.

69. (1) Resit-resit Koperasi hendaklah dikeluarkan bagi semua wang yang diterima olehnya. Resit-resit itu hendaklah ditandatangani oleh bendahari atau pegawai yang diberikuasa oleh Lembaga dari semasa ke semasa. *Resit-resit dan baucar.*

## KONTRAS – UNDANG-UNDANG KECIL

- (2) Baucar hendaklah disediakan bagi setiap pembayaran yang dibuat oleh Koperasi. Baucar-baucar tersebut hendaklah ditandatangani oleh bendahari atau pengurus serta disahkan oleh dua orang daripada pegawai-pegawai yang diberikuasa oleh Lembaga dari semasa ke semasa.
70. Menurut subseksyen 60(1) Akta, akaun-akaun dan rekod-rekod yang perlu berkaitan Koperasi ini hendaklah diaudit oleh seorang juruaudit yang dipilih oleh mesyuarat agung dan dilantik melalui suatu suratcara perlantikan menurut perenggan (b) subperaturan 27(2) Peraturan. *Pengauditan akaun-akaun.*
71. (1) Bagi maksud subseksyen 63(1) dan (2) Akta, juruaudit yang dilantik hendaklah memberi laporan mengenai penyata-penyata kewangan yang dikemukakan oleh Koperasi selepas berakhirnya tahun kewangan itu untuk perhatian Ketua Pendaftar serta anggota-anggota Koperasi ini. *Perlantikan juruaudit*
- (2) Perlantikan juruaudit dan penyerahan kepadanya rekod-rekod perakaunan dan rekod-rekod lain Koperasi ini untuk maksud pengauditan menurut subperaturan 27(4) Peraturan, hendaklah dimaklumkan kepada Ketua Pendaftar dengan mengemukakan satu salinan suratcara perlantikan yang dimaksudkan dalam undang-undang kecil 70.
- (3) Bagi maksud subperaturan 27(3) Peraturan, suatu senarai lengkap buku-buku dan dokumen-dokumen Koperasi ini yang diserahkan kepada juruaudit hendaklah disediakan oleh Koperasi untuk ditandatangani oleh juruaudit itu sebagai pengakuan penerimaannya. Sesalinan senarai itu hendaklah disimpan oleh Koperasi.
72. Satu salinan akaun perdagangan, akaun untung rugi, penyata sumber-sumber dan penggunaan wang, kunci kira-kira dan laporan Lembaga mengenai kedudukan hal-ehwal Koperasi dan subsidiari atau subsidiari-subsidiarinya yang telah dikemukakan untuk *Mengemukakan penyata kewangan dan laporan-laporan*

## KONTRAS – UNDANG-UNDANG KECIL

mendapat pandangan Ketua Pendaftar menurut subseksyen 59(2) Akta, laporan juruaudit dan laporan Jawatankuasa Audit Dalaman hendaklah disampaikan kepada tiap-tiap anggota tidak lewat daripada lima belas hari sebelum mesyuarat agung tahunan.

### BAHAGIAN VIII

#### PELBAGAI

73. Akaun bank bagi Koperasi ini hendaklah diuruskan bersama oleh pengerusi, bendahari dan setiausaha, atau pegawai yang diberi kuasa oleh Lembaga dari semasa ke semasa. *Akaun bank.*
74. (1) Koperasi ini hendaklah ada satu mohor. Mohor ini tidak boleh dimeteraikan di atas mana-mana surat melainkan dengan keputusan Lembaga. Pengerusi, setiausaha dan bendahari atau pegawai-pegawai lain yang diberikuasa oleh Lembaga dikehendaki menurunkan tandatangan mereka di atas tiap-tiap surat yang hendak dimeteraikan. *Mohor Koperasi.*
- (2) Dokumen-dokumen yang diperbuat atas nama Koperasi sama ada dimeteraikan atau tidak, dan ditandatangani dengan sahnya oleh pengerusi, setiausaha dan bendahari atau pegawai-pegawai lain yang diberikuasa oleh Lembaga hendaklah disifatkan mengikat ke atas Koperasi sehingga sebaliknya dibuktikan.
75. Tiap-tiap anggota hendaklah memberitahu setiausaha akan segala pertukaran alamatnya. Semua surat kepada anggota yang dihantar dengan pos atau dikirimkan kepada alamatnya yang terakhir hendaklah dianggap sebagai telah disampaikan. *Pertukaran alamat anggota.*
76. Bagi maksud seksyen 13 Akta, setiausaha hendaklah menyediakan - *Penyediaan dokumen untuk diperiksa.*
- (a) satu salinan Akta dan Peraturan;

## KONTRAS – UNDANG-UNDANG KECIL

- (b) satu salinan Undang-undang Kecil ini dan jika ada aturan-aturan aktiviti;
- (c) akaun teraudit Koperasi yang terakhir; dan
- (d) satu senarai lengkap anggota Koperasi ini,

yang terbuka untuk diperiksa oleh anggota-anggota Koperasi ini sahaja tanpa apa-apa bayaran, pada masa-masa yang munasabah di alamat berdaftar Koperasi ini.

77. Penyerahan tugas secara rasmi hendaklah dilakukan apabila berlaku pertukaran bagi apa-apa jawatan dalam Koperasi ini. Penyerahan tersebut hendaklah disempurnakan dalam tempoh tidak lewat daripada empat belas hari selepas berkuatkuasanya pertukaran itu. *Penyerahan tugas.*
78. (1) Seseorang yang dilantik untuk mewakili Koperasi ini di dalam apa-apa mesyuarat, seminar, forum atau lawatan sambil belajar atas perbelanjaan Koperasi ini sama ada di dalam atau di luar negeri mengikut peraturan 46 Peraturan, hendaklah mengemukakan laporan ringkas kepada mesyuarat agung tahunan yang akan datang yang terawal diadakan bagi Koperasi ini. *Laporan oleh seseorang yang dilantik mewakili Koperasi.*
- (2) Jika orang itu gagal mengemukakan laporan, dia hendaklah membayar balik semua perbelanjaan yang telah ditanggung oleh Koperasi ini. Koperasi berhak mendapatkan balik setiap perbelanjaan tersebut seolah-olah ianya suatu hutang yang kena dibayar kepada Koperasi ini.
79. Lembaga bolehlah melantik seorang kenamaan sebagai Yang Dipertua kepada Koperasi ini. Dia hanya bertindak sebagai penaung dan boleh menghadiri mana-mana mesyuarat yang diadakan oleh Koperasi ini tetapi tidak mempunyai hak untuk mengundi. *Perlantikan Yang Dipertua.*

## KONTRAS – UNDANG-UNDANG KECIL

80. (1) Segala pertikaian seperti yang disebutkan di bawah subseksyen 82(1) Akta yang menyetujui hal penubuhan, Undang-undang Kecil, pemilihan pegawai-pegawai, perjalanan mesyuarat-mesyuarat agung, pengurusan atau perniagaan Koperasi ini hendaklah dirujuk kepada Ketua Pendaftar atau tribunal menurut tatacara di bawah peraturan 33 Peraturan. *Pertikaian.*
- (2) Mana-mana anggota yang dibuktikan telah membuat pengaduan atau merujuk pertikaiannya kepada mana-mana orang selain daripada Ketua Pendaftar atau tribunal hendaklah dianggap telah bertindak dengan cara yang memudaratkan kepentingan Koperasi ini dan boleh dikenakan tindakan menurut undang-undang kecil 23.
- (3) Segala pertikaian selain daripada yang dinyatakan dalam subseksyen 82(1) Akta hendaklah dirujuk kepada mesyuarat agung Koperasi ini untuk penyelesaian. Apa-apa persoalan tentang sama ada pertikaian tersebut termasuk dalam maksud subseksyen 82(1) Akta hendaklah diputuskan oleh Ketua Pendaftar atau tribunal dan keputusannya adalah muktamad.
81. Anggota Lembaga, pegawai, pekerja, juruaudit atau mana-mana orang yang mempunyai akses kepada maklumat mana-mana anggota yang diperolehi dalam melaksanakan perniagaan atau tugas dengan Koperasi, tidak boleh digunakan untuk kepentingan peribadi dan tidak boleh dizahirkan kepada mana-mana orang tanpa izin anggota melainkan yang dibenarkan oleh undang-undang bertulis. *Pemeliharaan kerahsiaan*
82. Koperasi ini boleh dibubarkan hanya dengan perintah Ketua Pendaftar. *Pembubaran.*
83. (1) Undang-undang Kecil ini adalah dibuat mengikut peraturan 5 Peraturan dan hendaklah tertakluk kepada peruntukan-peruntukan Akta dan Peraturan. Apa-apa pindaan kepada Undang-undang Kecil ini tidak boleh dibuat melainkan dengan kehendak atau kebenaran *Akta, Peraturan dan Undang-undang Kecil.*

## KONTRAS – UNDANG-UNDANG KECIL

Ketua Pendaftar. Aturan-aturan aktiviti tidak boleh dibuat melainkan dengan kelulusan mesyuarat agung.

(2) Apa-apa urusan Koperasi ini hendaklah tertakluk kepada Akta, Peraturan dan Undang-undang Kecil serta aturan-aturan aktiviti, yang hendaklah dibaca bersekali.

84. Undang-undang Kecil ini menurut seksyen 17 Akta hendaklah mengikat Koperasi ini dan anggota-anggotanya sehingga takat yang sama seolah-olah Undang-undang Kecil ini telah ditandatangani oleh tiap-tiap anggota dan mengandungi waad pada pihak setiap anggota bagi dirinya sendiri dan bagi penggantinya untuk mematuhi segala peruntukan Undang-undang Kecil ini.

*Undang-undang Kecil hendaklah mengikat anggota.*

*- bahagian ini dibiarkan kosong -*



## KONTRAS – UNDANG-UNDANG KECIL

Diakui Undang-undang Kecil **Koperasi Niaga Teras Selangor Berhad** telah dibentang, dibincang dan diterima di dalam mesyuarat agung permulaan bertarikh **dua puluh empat** haribulan **Oktober** tahun **dua ribu dua puluh**.

BIL.	NAMA	NO. KAD PENGENALAN	TANDATANGAN
1	AHMAD BIN ZAINUL ABIDIN	730313-06-5783	
2	AHMAD FAIZAL BIN ISMAIL	730506-05-5143	
3	AHMAD ZAKI BIN AHMAD RAFA'I	730517-14-5793	
4	MOHD NOR BIN MAMAT	730726-11-5005	
5	MOHD ZAHIRULLAH BIN MOHD TAIB	730809-10-5769	
6	SALIHIN BIN ABANG	730103-13-5077	
7	KAMARULZAMAN BIN MOHAMAD	720827-11-5101	
8	MASDI BIN MUSTAPHA	731101-11-5421	
9	MOHAMAD NAZRI BIN AMAN	730923-10-5199	
10	WILDAN WAFI BIN AHMAD	000511-14-1375	